

Uunga siunnersuut: Illuliortiternernut aningaasalersuineq pillugu Inatsisartut inatsisaat nr. xx, xx. xxx 2017-imeersoq

(Kommuninut, Nunaqarfinnut, Isorliunerusunut, Attaveqatigiinnermut Ineqarnermullu Naalakkersuisoq)

Saqqummiussineq

(Kommuninut, Nunaqarfinnut, Isorliunerusunut, Attaveqatigiinnermut Ineqarnermullu Naalakkersuisoq)

Siullermeerneqarnera

Matumuuna Naalakkersuisut sinnerlugit illuliortiternernut aningaasalersuineq pillugu Inatsisartut inatsisissaattut siunnersuut saqqummiuppara.

Isertitat sumilu najugaqarneq apeqquaatillugit nammineerluni inissiamik pisinissamut periarfissat assigiinnngitsorujussuusut Naalakkersuisunit eqqumaffigineqarpoq. Taakku saniatigut illoqarfimmi najugaqarfimmiluunniit minnerusumi, illoqarfiit sisamat annerit, realkreditimit taarsigassarsinissamut ajornannginnerutitsiviusut avataanniittumi najugaqaraanni taarsigassarsinissamut periarfissat assigiinnngissinnaapput.

Innuttaasut inissianik imminnut pilersorsinnaasut amerlanerpaat imminut pilersussasut Naalakkersuisut anguniagaraat. Inissianik pilersuinermi nammineerluni aningaasalersuisinnaanerup annertunerulernerata kingunerisaanik, pisortat innuttaasunut aningaasaqarnikkut periarfissaqannginnerusunut inissianik pitsaasunik akikitsunillu inissaqartitsinnaanerinut periarfissaat pitsaanerulissapput. Innuttaasut nunatsinni sumiluunniit najugaqaralarunik inuuniarnermi atugassarititaasuni naligiinnerulernissaannik siuarsaanissaq Naalakkersuisut kissaatigaat.

Innuttaasut inissianik imminnut pilersorsinnaanerinut periarfissat ajornannginnerulersinneqassapput pilerinarnerulersinneqassallutillu. Taamaattumik Naalakkersuisut ineqarnermik aqqissuusseqqinnermut ilagitillugu najoqqutassiamik suliaqarput, pisortat taarsigassarsititsinissamut periarfissaannik najukkani inissianik niueruteqarnermut naleqqussaaviumik. Tassalu pisortat inissianik nutaanik sanaartornermut aningaasalersuinissamut taarsigassarsiarititaat taamaallaat kommuninit isumagineqartalernissaat, taamaalillunilu innuttaasut ataasiinnarmut saaffiginnittalernissaat siunnersuutigineqarpoq. Tamatuma kingunerisaanik konto pingaarneq 89.72.11 Nammineq inissianik tapiissutitalimmik sanaartorneq, ukiumut 35 millionit koruuninik aningaasartuuteqartartoq kommuninut, siunissami qinnuteqaatinik aqutsisuusussanut nuunneqassaaq.

Ineqarnermik aqqissuusseqqinneq inuunermi atugassarititaasut pitsaanerulernissaannik qulakkeereqataassaaq, minnerunngitsumillu aningaasaqarnermi uummaarissumik ineriartortitsinissamut tapertaassalluni. Aqqissuusseqqinnermi isertitakitsut akunnattumillu isertitallit atugaannut naligiissitsinerup inissianillu imminut pilersornerup annertunerulernissaata aallaavigineqarnissaa Naalakkersuisunit pingaartinneqarpoq. Inissianik aningaasalersuisarneq ataasiakkaanik iluarsineqarluni ingerlaqqissaaq.

Siunnersuummi §§ 5-8 naapertorlugit inissianik nutaanik sananissamut aningaasalersuinissamut taarsigassarsisoqarsinnaavoq, sumiiffiit ataasiakkaat apeqqutaatillugit assigiinngitsunik killeqartinneqartunik. Siunnersuummi Nuup avataani inissianik sananissamut sinaakkusiussat pitsaanerulersinneqarnissaat, tamatumunngalu peqatigitillugu Nuummi inissianik sananissamut aningaasalersuisarnerup nalinginnaangorsarneqarnissaanik aallartititsinissaq siunertarineqarpoq. Nuummi inissianik niueruteqarneq maanna ima annertutigilersimavoq qajannaatsigilersimallunilu, ineqarnermut tapiissuteqartarnerup annikillisarinnissaa ajornarunnaarsimalluni. Tamanna ineqarnermut politikikkut anguniakkanut, ilaatigut Napatitsinermut Siuariartornissamullu Pilersaarusiame allaaserineqartunut naapertuuppoq.

Inissianik nutaanik sananermut taarsigassarsiassat amerlassusissaannut killiliussat nunap immikkoortuinut aggorneqarnissaanik siunnersuuteqarnermi, maanna aningaasaqarnikkut atugaasut aammalu niuernermik tunngaveqarluni aningaasalersuinissap anguneqarnissaanut periarfissarititaasut aallaavigineqarput. Illoqarfinni nunaqarfinnilu ataasiakkaani aningaasaqarnikkut pissutsit allanngorneri agguasarnerup, taamatullu inissianik nutaanik sananissamut taarsigassarsititsisarnerup annikilleqqinneqarsinnaanerata atorunnaarsinnaaneratalu eqqarsaatigineqaaqqinnissaanut tunngaviliisinaapput.

Illunik nammineq pigisanik iluarsaassinermut taarsigassarsititsisinnaanerup ingerlaqqinnissaata saniatigut, soraanermusiallit inissiani pioreersuni iluarsaassinissamut aningaasalersuinissamut taarsigassarsisinnaanerannut periarfissamik ilanngussisoqarpoq. Taamaalilluni aalajangersakkat, ukiumoortumik aningaasanut inatsisinut nassuiaatinut ilaatinneqartut ingerlaqqissapput. Kisiannili siunnersuut annertuumik pitsannguiffiussaaq, soraanermusiallit 300.000 koruunit tikillugit taarsigassarsisinnaalissagamik.

Pensionisti aappani piginneqatigalugu inissiamik pigisaqarpat taarsigassarsititsisoqarsinnaasooq inatsimmut ilanngunneqarpoq. Aappaasup aamma pensionistiusariaqarnera piumasaqaatigineqanngilaq. Siunnersuutip soraanermusiallit nammineerlutik angerlarsimaffimminni najugaqaannarinnissamut periarfissaannik pitsaanerulersitseqataanissaa siunertarineqarpoq.

Taarsigassarsiat utertillugit akilerneqarnissaat pilerinarnerulersinneqassaaq. Naalakkersuisut § 37-mi siunnersuutigaat, inissianik nutaanik sananissamut taarsigassarsiat piffissaq sioqqullugu, aammalu piffissami atuuttumi naliusut tunngavigalugit akilerneqarsinnaassasut. Siunnersuut nutaamik aqqiissuussineruvoq, aammalu inissiani nutaamik sananeqartuni aningaarnikkut pisortanut pituttorsimanerup annikillisinneqarsinnaaneranut siunertanullu allanut atuisinnaaneremut iluaqutaassalluni.

Illuliortiternernut aningaasalersuineq pillugu Inatsisartut inatsisissaattut nutaatut siunnersuut ineqarnermik aaqqiissuusseqqinnermut ilaatinneqarpoq, taamatullu aamma piginneqatigiilluni inissiat pillugit Inatsisartut inatsisissaat nutaaq ilaasussaalluni.

Taamatut oqaaseqarlunga Naalakkersuisut sinnerlugit immikkoortoq Inatsisartuni suliassanngorlugu tunniuppara.